

Partido Raiz ta pidi pa transparencia riba maneho di medio ambiente

ORANJESTAD - Partido Raiz - entregando un peticion na ministernan pa bin cu mas transparencia den nan proceso pa establece e proyecto Zoëtry na Isla di Oro - kier haya acceso na cierto documentonan cu ta e base pa tuma e decisionnan di bin cu proyectonan den areanan di naturalesa. Nan ta pidi esaki pa comunidad tambe.

Ayera mainta tempran Ursell Arends, lider di partido Raiz, a pasa hunto cu Tai-Foo Lee na bestuurskantoor pa pidi ministernan encarga cu turismo, infraestructura y medio ambiente y minister di asuntonan economico, pa bin cu mas transparencia riba e desaroyo di e proyecto na Isla di Oro, cual lo por tuma luga si bin cu e cambionan necesario den e plan di desaroyo teritorial (ROP).

E peticion cu nan a entrega na ministernan ta encera - a base di ley di transparencia di gobernacion (Landsverordening Openbaarheid van Bestuur) - cu partido Raiz kier mira diferente documentonan cu lo a sirbi como base pa bin cu e proyecto aki. Esaki ta inclui primordialmente e estudio riba impacto socio economico (social economic impact assessment) y alabes e estudio riba e impacto medio ambiental (environmental impact assessment).

Bogando pa transparencia maneho di naturalesa

Raiz su meta cu esaki ta pa mira si en berdad e ministernan concerni ta tumando en cuenta e consehonan cu nan ta haya di e diferente departamentonan gubernamental, pero tambe pa mira si solamente ta basa e decision pa ehecuta e proyecto a base di e rapport entrega pa e propio desaroyadonan, cual no ta un documento imparcial pa determina cual e impacto lo ta riba naturalesa, economia y comunidad. Sr. Lee ta añadi: "Inversionistanan di e propio proyecto no lo bin cu rapportnan cu lo descarta nan proyecto of papia malo di e proyecto. Eseyan no ta rapportnan relevante ni imparcial."

"Nos sa cu e proyecto aki tin basta tempo ta canando, pues pa e rason aki nos kier tin acceso na tur e documentonan



cu e grupo isla a entrega na gobierno pa asina nos tambe por formula nos opinion correcto a base di datonan. Nos ta haya cu e decisionnan cu gobernacion y parlamento ta tuma mester ta a base di datonan y no emocion."

Raiz kier enfoca riba e area aki como punto di atencion, mirando cu esaki ta un di e 16 areanan cu lo mester a cay bou proteccion legal como area di naturalesa. "Si mi no ta hera, dia 13 di februari 2013, unanimamente parlamento a pasa un mocion cu ta delinea e 16 areanan aki como area di naturalesa y ta pone nan na maneho di Parke Arikok. Y si parlamento a dicidi di pasa e mocion e ora ey mi ta haya esaki mester tuma

bira un tipo di maneho."

Minister encarga cu medio ambiente, mientrastanto tabatin un conflicto cu e directiva di e fundacion encarga cu Parke Arikok, mirando cu nan a cambia nan statutonnan. E minister te hasta a declara den prensa varios biaha cu si ta necesario, aunke e no kier bay asina leu, lo bay parlamento pa crea un fundacion nobo pa maneha e areanan aki. Ki intencion e minister lo tin cu esaki no ta conoci.

Ora Bon Dia a trece esaki na atencion di sr. Arends, di su banda el a comenta bisando: "Nos no ta kere cu un discusion entre e directiva di e parke y e minister mester nifica cu e directiva mester

bay. Den mundo moderno cu nos ta biba, mi ta kere tur hende por surpasa diferencia den opinion por medio di sinta na mesa y papia cu otro pa crea solucion. Mi ta kere Parke Arikok a haci un bon trabou den maneha e parke e ultimo añanan cu nan diferente esfuersonan."

Durante tratamento di presupuesto Bon Dia a acerca minister di turismo riba e aspecto di e rapportnan cu gobernacion anterior a basa nan mes riba dje pa dicidi riba e proyecto aki.

Manera minister di turismo a menciona e tempo ey, e ta haya cu mirando cu e cambio den e ROP lo por tarda 1 pa 2 aña ainda, lo mester bin un

rapport nobo imparcial di un otro instancia, teniendo na cuenta consideracionnan di NGOs. "Sinembargo, esaki ta e tipo di proyectonan cu nos kier pa bin mas na Aruba. Tin tiki di e tipo aki den Caribe y e ta un mercado nobo pa nos explora."

'Eco-hotel no ta existi'

Sr. Arends ta splica cu ta treciendo esaki na atencion di e ministernan mirando cu tabatin un protesta - manera nos a publica anteriormente -riba dia 2 di april ultimo dilanti Isla di Oro, unda varios instancianan no gubernamental (NGO nan) lidera pa Aruban Warriors a protesta contra e desaroyo di e proyecto Zoëtry cu lo kier establece su mes como un 'eco-hotel' na costa di e mangelnan.

Ademas, segun sr. Arends, 'no ta existi un eco-hotel'. Esaki ta concorda cu opinion di Aruban Warriors, cual a yega di expresa na Bon Dia cu e nomber 'eco-hotel' ta un 'contradiccion den terminologia, manera papia cu un lenga dobel'.

Sr. Arends, contestando pregunta di un colega di prensa di medio 24ora, si eco-hotel no ta existi, a expresa cu 'eco-hotel no ta existi, pasobra tur hotel ta haci daño na naturalesa. Ora bo bay construi bo tin cu bay haci daño na naturalesa'.

Continuacion riba Pagina 4

